



SAKSPAPIR

Saksnr	Utval	Type	Dato
39/2015	Formannskap/plan- og økonomiutvalet	PS	20.04.2015

Sakshandsamar	Arkiv	ArkivsakID
Tore Henrik Øye	FE - 242, FA - K00	15/93

TILDELING AV FONDSMIDLAR TIL GRAFISK UTFORMING OG PRODUKSJON AV INFORMASJONS-TAVLER OM KULTURMINNA I ALMANE, GNR. 64, BNR. 1, BERGO I EKSINGEDALEN

Vedlegg:

Almane KOSTNADSOVERSLAG
ALMANE Prosjektet gjeld
Søknad FOND

Rådmannen sitt framlegg til vedtak:

Formannskapet/plan- og økonomiutvalet i Vaksdal kommune løyver inntil kr 15 000,- og maksimalt 50 % av totale kostnader i tilskot til Liv Anne og Sveinung T. Bergo, innehavarar av gnr. 64. bnr. 1 på Bergo i Eksingedalen, til grafisk utforming og produksjon av 5 stykk informasjonstavler om kulturminna i Almane.

Midlane vert løyvd frå «Vaksdal kommune sitt fond for vilt, fiske og friluftsliv», der formannskapet er fondsstyre. Tildelinga er heimla i §§ 2 og 5 i fondsvedtektene.

Øvre grense for godkjent kostnad, vert sett til kr 30 000,-.

Tilskotet vert utbetalt etterskotsvis, når sluttrapport med naudsynt dokumentasjon ligg føre (faktura, bilete og liknande).

Arbeidsfristen for tiltaket vert sett til mars 2018. Etter dette vert tilskotet trekt tilbake, dersom det ikkje blir søkt om utsett arbeidsfrist i inntil eitt år. Vaksdal kommune kan synfare tiltaket.

VILKÅR: Almane skal vere tilgjengeleg for ålmentas ferdsle og rekreasjon.

Saksopplysningar:

Bakgrunn

Liv Anne og Sveinung T. Bergo, grunneigarar på gbnr. 64/1 på Bergo i Eksingedalen, søker om midlar frå «Vaksdal kommune sitt fond for vilt, fiske og friluftsliv» til grafisk utforming og produksjon av 5 stykk informasjonstavler til bruk i kulturlandskapet i Almane.

Almane er tidlegare slåttemark på garden. Området inneheld fleire kulturminne, som kvernhus, uteløer, kolmine, «banevegen» med meir. Grunneigarane ønskjer å ta vare på desse kulturminna, og gjere området kjent og tilgjengeleg for andre gjennom tilrettelegging og informasjon. I dette høve vert det søkt om økonomisk støtte til å lage informasjonstavler.

Grafisk utforming og produksjon av tavlene er budsjettert til kr 30 000,-. Totalkostnaden med prosjektet, inkludert alle planlagde tiltak, er kostnadsrekna til kr 73 000,-.

I 2014 gav Vaksdal kommune kr 21 500,- i SMIL-midlar til prosjektarbeidet i Almane. Det vart ikkje gjeve tilskot til utarbeiding av informasjonstavler. I handsaminga synte kommunen til «Vaksdal kommune sitt fond for vilt, fiske og friluftsliv» til dette føremålet.

Almane vert allereie i dag brukt som tur- og aktivitetsområde, mellom anna av turlag, barnehage og skule. Målet er at den planlagde tilrettelegginga for ferdsle, opphald og kulturformidling, skal auke Almane sin verdi som friluftslivs- og rekreasjonsområde i landbruket sitt kulturlandskap.

Vurdering

Tilrettelegging for friluftsliv er eitt av føremåla til «Vaksdal kommune sitt fond for vilt, fiske og friluftsliv», jfr. §§ 2 og 5 i fondsvedtektene. I dette høve ligg søknaden innafor førermålet, sidan intensjonen med omsøkt tiltak er å informere om kulturminna i eit landskapsområde som vert tilgjengeleggjort og tilrettelagt for ålmenta.

Søknaden om tilskot til grafisk utforming og produksjon av informasjonstavler, inngår som del av ei større satsing for å utvikle Almane som tur- og opplevingsområde, også i undervisnings- og reiselivssamanheng. Informasjonstiltaket vil såleis vere med å skape ein naturleg heilskap, og synleggjere området sin lokalhistoriske verdi på ein god måte.

Rådmannen ser på budsjettert beløp for utforming og produksjon av tavlene, kr 30 000,-, som øvre grense for godkjent kostnad i tilskotssamanheng.

Fondsvedtektene seier ikkje noko spesifikt om tilskotssatsar frå fondet, og finansieringsgraden kan variere frå tiltak til tiltak. I denne konkrete saka, vert 50 % finansiering vurdert som passande. Dette gjev kr 15 000,- i maksimalt tilskot, som er innafor ramma av tilgjengelege fondsmidlar.

Konklusjon

Omsøkt tiltak samsvarer med føremålet til «Vaksdal kommune sitt fond for vilt, fiske og friluftsliv», og tiltaket vert vurdert til å ha stor ålmenn nytte. Rådmannen tilrår difor tildeling av fondsmidlar.